


खोन्दो 3

मिथिंगानि अनथोबफोर

खोन्दोनि सोमोन्दै

जिब-जुनार आरो बिफां-लाइफांनि अनगायैबो, जों मिथिंगायाव दै आरो आदार बायदि गोबां मुवाफोर नुनो मोनो। बेफोर जोंनि गोगो जिउ खांनायाव बेसेन गोसा सम्फद।

बे खोन्दोआव दै आरो आदारखौ नागिरना दिहुनो। जों सावसिनां आदार जानो आरो गोगो दै लोंनो थांखि लानांगोन। साखोन-सिखोन थानाय आरो ब्याम खालामनाया जोंखौ मोजां मोन्दांनो आरो सावसि थानायाव मदद होयो। जों जोंनि बुहुमनि सम्फदफोरखौ इयुनाव रैखा खालामनोबो सोलोंनांगोन।



फोरोंगिरिनि थाखाय रेबसुं

बे खोन्दोआ 'मिथिंगानि अनथोब' नि सोमोन्दै। बेफोर खोन्दोफोराव लाफानाय गाहाय सानदांथिफोरखौ गाहायाव बरनायनाय जादों।

आयदा 7: दै - मोनसे बेसेनगोसा अनथोबआ दिन्थियो दि माबोरै अखाया जोंनो दैन बेसेनगोसा अनथोब होयो, जायखौ उनाव गुबुन-गुबुन रोखोमै दोनथुमनाय जायो। जों बे दैन साखोन-सिखोनखौ थि खालामो आरो बेखौ नखरफोराव रान्ना होयो। मोनफ्रोमबो न'खरानो सानफ्रोमबो बाहायनायनि थाखाय दै दोनथुमो, बेखौ गोबां रोखोमै बाहायो। थेवब्लाबो, दैन गुन आरो बिबां मोन्नैखौबो लानानै जेनाफोर नुजायो। बेफोर जेनाफोरखौ फोसाबनो, जों दैन फुंखाफोरखौ रैखा खालामनो थांखि लानानै बायदि बायदि राहाफोरखौ बाहायदों।

आयदा 8: जों जानाय आदारा जोंनि सावस्रिखौ मोजाडै लाखिनायाव आदारनि गोनांथार बिफावखौ बुजिनायाव जोंखौ मदद खालामो। जों गुबुन गुबुन फुंखाफोरनिफ्राय मोन्नाय बायदि रोखोमनि जाग्रा आदार जायो। मोनफ्रोमबो जाग्रा मुवाया गोनांथार पुष्टिफोर होयो जाय जोंनि देहाखौ रुजुजायै आदबजों मुलाम्फा होयो। जोंनि गुबुन गुबुन हारिमुफ्रा गुबुन-गुबुन जाग्रा आदारनि पुष्टिगोनां बेसेननि बादै बेसेनगोसा गियान दं आरो सावस्रिनां आदार सायख'नायाव लामा दिन्थियो।

आयदा 9: सावस्रि आरो खुसि थानाया साखोन-सिखोन आरो मोजां सावस्रि लाखिनायनि गोनांथियाव गोसो होयो। जों जोंनि न'फोर आरो सोरगिदिं साखोन-सिखोनखौ रोखा खालामनानै आरो साखोन-सिखोननि गोनांथार खान्थिफोर आरजिनो हायो। नेमबादियै ब्याम खालामनाया जोंनि रुटिननि मोनसे बाहागो जायो, जाय देहायारि गोगोथि आरो गोसोआरि गाहाम मोन्नैखौबो बांहोयो। जोंनि आबहावानि गायसनजानाय नेम आरो खान्थिफोरखौ बुजिनानै आरो फालिनानै, जों गावखौ जाथावना खहानिफ्राय रैखा खालामो।



- थाखोयाव मोनसे 'आदार मेला' नि बिथांखि ला; बायदि रोखोमनि जाग्रा मुवाफोर जेरै, बेगरफोर, मस्लाफोर, फिथाइ-सामथाइफोर, मैगं-थाइगंफोर बायदिफोरखौ दिन्थिफुनो नाजा।
- दै दोनथुमनो थाखाय बाहायजानाय बायदि रोखोमनि कन्टेनार आरो दिडाफोरनि सायाव मोनसे दिन्थिफुंसालि खुं; नों सावगारिफोरबो दिन्थिनो हागोन।
- आदार, दै, साखोन-सिखोन आरो सावस्रिनां हुदाफोरजों सोमोन्दो गोनां नंगुबै आरो बैसो-आरजाथाव सुंद' भिडिअ' आरो सावथुन, सल' बिजाब आरो खन्थाइफोरखौ बाहाय।
- दावबायनाय एबा नायदिग्राफोर: रैखाथिजों लोगोसे नोंनि खाथि-खालानि दैन गुबुन गुबुन फुंखाफोराव दावबायनो बिथांखि ला। यगा आसनफोर मोजां सावस्रिनि थाखाय; साखोन-सिखोन आरो साखोन-सिखोन लाखिनायनि सोमोन्दै गथ'फोरजों रायज्जायनो थाखाय सासे सावस्रि फाहामगिरिखौ हांखायहर; आदारनि समाव बिमा-बिफा आरो समाजनि सोद्रोमाफोरखौ गावसोरनि दोरोडारि जामुंफोरखौ रानलायनो आरो रायज्जायनो थाखाय खावलाय।





दै – मोनसे बेसेन गोसा अनथोब



अखा, अखा, फै आरोबाव!



गाहायाव मा फैयो,

नाथाय माब्लाबाबो गोजूआव थाडा?

सप्तासेनि थाखाय सानफ्रोमबो अखांखौ नाय। अखा हागोन नामा? नॉनि साननाया माखासे सानफोराव थार जानो हागौ, आरो माखासे सानफोराव बेयो गोरोन्थि जानो हागौ।

माबाफोर सुलु दं नामा जाय नॉखौ अखा हागोन ना हाया साननायाव मदद खालामो? नॉनि देरसिननाव सों दि बिसोरो माबोरै अनुमान खालामो। सुलुफोरखौ लिर।



लिर


आं सानो दिनै अखा हागोन मानोना ...

(खमैब्लाबो मोन 2 सुलु लिर)

आं सानो दिनै अखा हानाय नडा मानोना ...


(खमैब्लाबो मोन 2 सुलु लिर)

बेवहाय अखा हायो!



फोरोंगिरिनि थाखाय रेबसुं

बे आयदानि गिबि बाहागोखौ जेब्लानो नॉनि ओनसोलाव अखा हायो अब्लानो खालामनो हायो। गथ'फोरा उदांयै नोजोर होनो हायो, सोंथि खालामनो हायो, अनुमान खालामनो हायो, सावरायनो हायो, आखिनो हायो आरो गावसोरनि नोजोरफोरखौ रेबगान्थि खालामनो हायो।





हाबा-फारि

1


अखानि सोमोन्दै गावखौनो जेसेबां हायो एसेबां सौलु सौं ।

- बियो रोजा अखा ना रेजें ?
- अखानि थरथिंफोरा गिदिर ना फिसा ?
- बिसोर गोख्रै गाहायाव फैयो ना लासै ?
- अखाया ओरैबादि गिलिर नामा दि नों दैनि थरथिंफोरखौल' नुवा, नाथाय दैनि दिरुंफोर एबा बिलाइफोरखौल' नुयो ?
- अखाया थोंजोडै गाहायाव गोगलैदों नामा ? बेयो खेंसालिया एबा गावनि दिगखौ सोलायगासिनो दं नामा ? साननानै ला मानो ।
- अखानि दैखौ मोनसे आयजेंडाव बुथुम । बेयो साखोन-सिखोन ना मैला नुनायाव ?



बो

- नों नुनाय अखानि सावगारि बो ।





- दिनै फिन अखा हाफिनगोन होन्ना नों सानो नामा ? ना गाबोन ? नों मानो बेबादि सानो ?
- खालि नौनि ओनसोलावल' एबा खाथि-खालानि गुबुन जायगाफोरावबो अखा हादोंमोन नामा ? साननानै ला, बेनि उनाव सों आरो मिन्थिना ला ।
- अखानि सोमोन्दै माखासे मेथाइफोर नागिर एबा मोनसे बानाय, नौनि रावाव एबा जायखिजाया रावाव । अखानि सोमोन्दै माखासे मेथाइ रोजाब ।
- अखाया नोंखौ गोजोन होदों नामा ? बेयो बयखौबो खुसि खालामदोंमोन नामा ?

अखानि दैया मा जाखो ?

जेब्ला अखा हायो, अब्ला गोबां दैआ हायाव गोग्लैयो । बे दैया बहा थांखो ?

बेयाव गुबुन-गुबुन बिखंफोराव गोग्लैनाय अखा दं । सानना ला गुबुन गुबुन बिखंफोराव अखानि दैया मा जायो ।

अखानि दैया हायाव सोबलाडो नामा, हाखरफोराव जमा जायो ना बोहैलाडो ? नों माब्लाबा सानदों नामा दि बेयो मोनसे फिसा दैसा एबा दैमायाव गोरोबहैयो ?

अखा थाथ'नाय आरो सान ओंखारबोनायनि उनाव मा जायो ? बे गासैबो दैया मा जायो ? गावनि साननायफोरखौ गावनो खालाम ।

जेब्ला अखानि दैया हायाव सोबखाडो, अब्ला बेयो मोनसे निजिरा एबा फुखिजों लोगो जानो थाखाय लासै-लासै हानि सिडाव बोहैनो हागौ । माखासे दैया अन्थाइ आरो हानि गेजेराव हानि सिडाव जमा जायो । जौनि दैखरफोरनि दैया बे हा सिडाव थानाय दैनफ्राय फैयो ।

मोनसे दैसायाव बोहैनाय दैआ उनाव दैमाफोरजों गोरोबहैयो । माखासे दैफोरा हाखरफोर, फुखिफोर आरो बिलोफोर आरो लैथो आरो लैथोमाफोरावबो ज' जायो ।





- नॉनि गामि एबा सोहोरनि साखाथियाव माबा दैसा, फुखि एबा बिलो दं नामा ? बेनि मुं आरो बेनि सोमोन्दै माखासे फोरमायथिखौ नागिर । बेयाव थां आरो बेनि सावगारि बो । जायखिजाया बिफां, दावफोर एबा जिब-जुनारफोरखौ आखि जायखौ नों बेनि सोरगिदिं नुयो ।
- मोनसे दैमानि सोमोन्दै दोंसे खन्थाइ नागिर आरो बेखौ थाखोआव रोजाब ।


दैआ मोनसे बेसेन गोसा अनथोब !

दैआ मोनसे अनथोब जाय अखानिफ्राय गोग्लैयो । बे अनथोबआ जॉनि न'आव जर'खा लामाजों सौफैयो ।

बे अनथोबखौ जों माबोरै जोथोन लायो ? जों बेखौ माबोरै दोन्थुमगोन ? जों बेजों मा खालामो ? फै जों न' सिडाव थांनि आरो मिथिनि ।

बांसिन सानफोरावनो, सुर्य आरो बरखाया न'आव टेपनिफ्राय दै बाहायो । फरायसालियावबो बिसोर टेपनिफ्राय दै बाहायो ।

बे गासैबो टेपफोरा पाइपनि गेजेरजों दै मोनो । बे पाइपफोराव दैआ बबेनिफ्राय फैयो ? सुर्य आरो बरखाया पाइपफोरनि उन उन थांनायसै आरो नुदोंमोन दि उखुमआव गंसे टेंक दंमोन । दा बिसोरो गोनो गोथोआव गोग्लैयो दि दैआ माबोरै टेंकआव हाबफैदोंमोन ।



फोरोंगिरिनि थाखाय रेबसुं

दैनि साइकेलखौ थाखो 4 आवल' लाबोनाय जागोन । दानि थाखाय, गथ'फोरखौ नोजोर हो दि गोरा बिखंफोराव थालांनाय दैया सान्दुडाव रानलाडो । हायाव बोहैलांनाय अखानि दैया बयनिखुइबो गोनांसिन, मानोना बेयो जॉनि दैनि फुंखाफोरखौ रिसार्ज खालामो आरो बिफां-लाइफांफोरखौ देरनायाव मदद खालामो ।




सावराय

नों बबेनिफ्राय दै मोनो ?




नों टेपनिफ्राय दै मोनो नामा ? जुदि नंगौ, अब्ला नॉनि न'नि गेदेरफोरनाव सों दि दैआ टेपआव बबेनिफ्राय फैयो । बिसोरो नॉनो उखुम सालियाव एबा एसे गोजानाव थानाय टेकनि सोमोन्दै खोन्थानो हागौ ।

नों माबाफोर टेकफोरनि बागै मिन्थिदोंमोन नामा जेराव दैखौ दोन्नाय जायो ? बै टेकफोराव दैआ माबोरै सौहैदोंमोन ? बे टेकआव दै लाबोग्रा माखासे गिदिर पाइपफोर दं नामा ? बे पाइपफोरा बबेनिफ्राय फैयो ?




नों दैखरनिफ्राय दै मोनो ना ब'रवेलनिफ्राय ? दैखरनिफ्राय माबोरै दै बोनाय जायो बेखौ नाय । बेयो दै बोखोग्रा एबा दुमखल एबा मोब्लिबारि दुमखल बाहायनो हागौ । दैखरनि दैया बबेनिफ्राय फैयो बेखौ आरोबाव सानना नाय ।



सोरबा नॉनि न'आव टेप एबा दैखरनिफ्राय एबा एसे गोजानाव थानाय दैमा एबा बिलोनिफ्राय दै लाबोयो नामा ? बे दैखौ सोर दैखोयो ? बिसोर बेखौ माबोरै लाबोयो ? जाय सुबुफोरा नॉनो दै लाबोयो बिसोरखौ नों गिदिर 'साबायखर' बुं !



- नों टेकारनिफ्राय दै मोनो नामा ? जुदि नंगौब्ला, टेकारफोरआव बबेनिफ्राय दै फैयो । नों बाहायनाय दैया नॉनि गामि एबा सोहोरनि साखाथिनि दैखर, दैमा एबा बिलोनिफ्राय फैयो नामा ?
- नों मिथिगौ नामा सोरखौबा जाय सानफ्रोमबो दै मोननायाव गोब्राब मोगा-मोगि जायो ?



जॉनि सानफ्रोमबोनि जिउआव दै



लिर

- बैफोर गासिबो हाबाफोरखौ फारिलाइ खालाम जायनि थाखाय नों साननो हायो जायनि थाखाय जोंनो दैनि गोनांथि दं ।
- गावनि हाथाइखौ ब्रास खालामनो थाखाय नोंनो बेसेबां मग दैनि गोनांथि जायो? दुगैनो थाखाय नों बेसेबां दै बाहायो?

नों माब्लाबा ओरैबायदि थासारिजों मोगा-मोगि जानांदों नामा जेब्ला नों दै मोनाखैमोन? अब्ला नों मा खालामदोंमोन?

सानसेखालि बेयो सुर्य आरो बरखा जोंबो जादोंमोन । नों मिथियो ना बिसोर मा खालामदोंमोन?






नागिर

नोंनि आबै-आबौ एबा जायखिजाया गेदेरखौ सों:

- बिसोर माबोरै दै मोनखो ? बिसोरो नोंनि बायदि रोखोमसे दै बाहायदोंमोन नामा ?
- बिसोर दैखौ माबोरै दोनथुमदोंमोन ?
- नों मा मोन्नो हादोंमोन बेनि सोमोन्दै मोनसे सुंद' सल' लिर ।

जेब्ला जों मिथिनो मोनो दि जों जेब्लाबो दै मोना, अब्ला जों बेखौ दोनथुमो । माखासे जायगाफोराव, सुबुंफोरा गावसोरनि न'आव टेप आरो पाइपनि गेजेरजों बोहैनाय दै मोना । बिसोरो दैमा एबा दैखरनिफ्राय दै लाबोनांगोन । माब्लाबा माब्लाबा बेखौ दैनि टेंकारनि गेजेरजों होनाय जायो आरो न'आव दोनथुमनाय जायो ।

गोबां बोसोर सिगां बहुमाव जेरावबो पाइप एबा टेप गैयामोन । बेनिखायनो सुबुंफोरा दै दोनथुमनो थाखाय कन्टेनारफोर बानायनो सोलोडो । बेवहाय माखासे जाहाजफोर दं जायखौ जों आथिखालाव न 'आव दै दोनथुमनो थाखाय बाहायो । बेफोरो गुबुन गुबुन मुवाफोरजों बानायनाय जायो ।



हाब्रुनि दो



हाब्रुनि सुराहि




तामानि आइजें



फिथ्लायनि दो



स्तिलनि लथा




एलुमिनियामनि आयजें



ग्लासनि बथल





प्लास्टिकनि
बथल






प्लास्टिकनि बाल्टिं

दसे समनि थाखाय थाद' आरो सान!



- दैआ अखा बायदि बुहुमनि गाहायाव फैयो ।
- बेयो लासै-लासै जोंनि गोबां फुखाफोर-निजोराफोर, दैमाफोर, फुखिफोर, बिलोफोर, दैखरफोर, हा सिडाव थानाय दै बायदिफोरखौ आबु खालामो ।
- बेफोर फुखाफोरनिफ्राय जों गोबां रोखोमै जोंनि न'आव दै लाबोयो ।
- जों बेखौ गोबां रोखोमै दोनथुमो ।
- जों बेखौ गोबां रोखोमै बाहायो ।
- जों बेखौ बाहायनायनि उनाव दैआ मा जायो?



दैआ बेसादफोरखौ साखोन-सिखोन लाखिनायाव जोंखौ मदद खालामो । बेयो जोंनि सावसिनि थाखाय जोबोद गोनांथार । नाथाय जों बेखौ बाहायनायनि उनाव दैया मैला जायो । जों लोंनो एबा संनायाव मैला दैखौ बाहायनो हाया । नाथाय जों गाज्जि दैखौ जोंनि बिफां-लाइफांफोरखौ दै होनो एबा खिख'रसालिखौ फलश खालामनो थाखाय फिन बाहायफिननो हायो ।

फै जों दैनि बाहायनायखौ **खम खालामनो** नाजा आरो जेब्लानो हायो दैखौ **फिन बाहायफिन** ।

जों दैयाव बांद्गाय साबोन आरो बेबादि गुबुन रासायनिकफोर होफादेरनो नाडा । फै जों अखांनि बे बेसेन गोसा अनथोबखौ जोथोन लानि !

गासैबो थरथिंखौ सान

दैखौ गोथार होनना मानिनाय जायो मानोना बेयो जॉनि थांना थानायनि थाखाय जोबोद गोनांथार । जों लोंग्रा दै गैयालासे 3 साननि बांसिन थांनानै थानो हाया । बे जाहोननि थाखायनो जों गिबियाव जॉनि न'आव फैनाय सुबुंफोरनो दै होयो ।

माखासे जायगाफोराव, जेराव जोबोद खम अखा हायो आरो दैनि गिदिर बाहागो गैया, सुबुंफोरा दै मोननो थाखाय गोलाव जानथाय थाबायनो गोनां जायो ।


नों सानो नामा बयबो जेरावबो, जायखिजाया समावनो गोगो लोंग्रा दै मोननांगौ ?

खामानि माव


जाय नॉनि दरखडाव फैयो बेनो गोगो लोंग्रा दै जासि । बेयो बै सुबुंफोर जानो हागौ जाय जॉनो डाक एबा साखोन-सिखोननि मावमिन होयो । गोबां जायगाफोराव, न'फोरनि बायजोआव दैनि आयजें दोन्नायनि दोरों दं जाहाथे जायखिजाया सुबुडा दै लॉनो हायो । गोलोम बोथोरनि दानफोराव बेयो गुबैयै जायो ।



सुबुंफोरनि थाखाय बेसेन नाडै लोंग्रा दै



टेंकाव जुनारफोरनि थाखाय दै लॉनायनि राहा




दाउ दुगैनाय



मासे दाउ दुगैनायनि थाखाय थियारि खालाम - गोलोम बोथोरनि दानफोराव दावफोरनो दै हो ।

दाव दुगैग्रायाव दावफोरा लोनो आरो गुसु जानो थाखाय मोनसे थौले प्लेटआव दै थायो ।

- मोनसे थौले आरो गुवार आयजें (मोनसे गोजाम गिदिर खुरै एबा गोजाम आयजेंनि गुदि एबा बाल्थिं, 10 सेन्टिमिटारनि खमसिन गोथौ) ला ।
- दावफोरा जिरायनो थाखाय बेयाव माखासे अन्थाइफोर दोन । नों माखासे फिसा अन्थायफोर होफादेरनानै फारसेथिं गोजौ गाहाय खालामनो हागोन । फिसा अन्थाइफोराबो एम्फौ-एनलाफोरखौ बे दैखौ बाहायनायाव मदद खालामो ।
- थाजिम दै होनानै खुरैखौ गावनि सिथ्ला, बालकनि एबा टेरेसाव दोन ।
- दैखौ गले-गले सोलायबाय था ।
- सप्तायाव खेबनै मोदोम हुग्राजों दुगैग्रा दाउखौ साफा खालाम । बे मोदोम हुग्राखौ ओखाम संग्रानि आइजें-आइलाफोरखौ सुनो थाखाय बाहायनाडा; बेखौ बिबारबारनि थाखाय दोनथुमना दोन ॥



फै जों रिफ्लेक्ट खालामनि

क. लिर

1. नों अखाखौ नेदोंमोन आरो नायदोंमोनदि माबोरै अखानि थरथिंफोरा हायाव गोग्लैदोंमोन । नों अखानि दैखौ बुथुमदोंमोन आरो नायदोंमोन दि बेयो साफा ना मैला मोन । नों नुदोंमोन गुबुन गुबुन जायगायाव गोग्लैनाय अखानि दैया मा जादोंमोन । दानिया अखानि सायाव नोंनि नोजोरनि सायाव माखासे सारिफोर लिर ।
2. नों नोंनि जायगानि साखाथियाव मोनसे दैसा, दैमा, दैखर, फुखि एबा बिलोनि सोमोन्दै मुं आरो माखासे खारिथि मोन्नो हादोंमोन । बेखौ माखासे सारिफोराव लिर: बे दैखौ लोंनो थाखाय बाहायनाय जायो नामा ? जुदि हायो, अब्ला बे दैखौ नोंनि न'सिम माबोरै लांनाय जायो ? जुदि बेखौ बाहायनाय जाया, अब्ला मानो जाया ? बेखौ सिगांनि समाव बाहायनाय जादोंमोन नामा ?

ख. आखि

नोंनि दुगैनाय दावनि सावगारि बो । नोंनि दुगैया दावनि जायगायाव दै लोंनो फैनाय दावफोर आरो एम्फौ-एनलाफोरनि मुंफोरखौ लिर ।

ग. सावराय

दैआ जोबोद बेसेनगोनां। जों बेखौ माबोरै बाहायो बेनि सायाव जों सांग्रां जानांगौ। जों दैखौ थरथिंसेबो ओरैनो गारनो नाडा। गावजों गाव सावरायलाय आरो नोंनि न'आव एबा बायजोआव थानाय खामानिफोरखौ फारिलाइ खालाम, जायनि जाहोनाव दैया गुबुंले एबा ओरैनो गारलाडो। जों माबोरै दैनि बाहायनायनिफ्राय बारग'नो हायो? नोंनि हान्जाजों मोनथाम सुस्रानायनि बाश्ना सान, आरो बेफोरखौ नोंनि नटबुकाव लिर।

